




# ई सि अय राजमहल डयोसिस



चुटि दिनेनो बाइबिल पड़ायिद्



मूल सबाद्: बाइबिलेद् ऐंकि अपोकारेद्

“ओ येहोवा, एन निंग्कि बाचात्रेन एनोपान कीड़वारिन! अन्ते

निंग्कि ऐयनेनो ऐंगे अपोकारेद्।”

चामे 119:174

# पाटेद्

दिनेद्	मूल सबाद्	मनन वचनेद्	क्वेरि
जेजुव्र दिनेद्	जेजुव्र सबाद्	चामे 119:174	मेरि जोन्स
दिनेद् 1	बाइबिलेद् उजेन चियुद्	योहन्ना 5:39	वाचमेन नी
दिनेद् 2	बाइबिलेद् मीलेन ओन्दिद्	योहन्ना 15:7	सादु सुन्द्र सिंग
दिनेद् 3	बाइबिलेद् जक्रोन पूरात्रिद्	दोहरेत्रेकि 8:3	डेविड सुन्द्रानन्दम (1771-1806)
दिनेद् 4	बाइबिलेद् उजेन चियुद्	मति 7:24	आतर मारगोसिस (1852-1908)
दिनेद् 5	बाइबिलेद् एजरात्रुद्	चामे 19:7	मालतो बाइबिल अनुवादेकि इतिहास
ओंग्र दिनेद्	माक्रोन्द पहरानो किलास जांच अन्ते दूपहरानो आक्रि प्रोग्रामेद्		

# दिनेद् 1: बाइबिलेद् उजेन चियुद्



## मनन वचनेद्

“नीम दर्म-किताबेन पड़यनेर, इकनिकि अदि पावे एम जुगा-जुगि उजेन कक्रेम आव्य नीम उगलेयनेर, जे आ दर्म-किताबेनोहि ऐंग पन्तेनो गोहायिद् बेहिद्।” योहन्ना 5:39



## बाइबिल केरिद्

2 राजार 23:3 योसिया राजा यिहुदा देसिनो राज नन डोकयाह आ बचेरिनो, योसिया गोसाञ्चि ऐयनेकि किताबेन अन्डाह अन्ते अदे पड़चाह। आ अन्ड ओजप गोसाञ्चिकि ऐयन किताबेकि गोट सबान मूलारिन अन्ते गोट मलेरिन पड़चले मेन्त्रयाह। अन्ते मलेर उगलारोति जेजयार अन्ते इस्रेएल मलेरकि पत्यारेद् अन्ते गोसाञ्चि मेचा आस्यारेद् नन्दु जियारयाद्। मल मजिनो ऐजगरेद् बरचाद्। आ देसिनो क्रोकवारकेर मूरतिन ऐड़वु गोट मलेर गुमेनारकेर तम्कि परानि बागु उजेनो पुन लेहारयार। ताम गोसाञ्चि सबानो चलारेम आव्य सबा-कुमेक कोरचार अदे उगलारयार।

इन्ति दिने हों गोसाञ्चिकि सबाद् नमकि परानिबागु उजेद् एडु मेनोति लेग-लेगात्रिद्। अन्ते नमकि परानि बागु उजेनो ऐजगरेन ओन्दिद्। नमकि पच मलकि चलारेन इचेके तूवोति मेनिद् अन्ते पुन उजेन जेजोति मेनिद्।

## केरि बा नाटकेद्

इनो चारेन्डा आकेन अन्ते ओर्त नुनिकि पन्तेनो टुन्डोति एकित। आद् गा मोटो मोबाइल पोने, टि.विकि रिमोटे, अन्ते लेपटापे (कम्पयुटरे) अन्ते ग्रेसि नामि ओर्त नुनि। मोबाइल पोने अन्ते टि.वि आदा माक्का जिम्न नक्कार अन्ते ग्रेस नुनि नेकेन बेसि उगलेयिद् आव्य गोगि मेन्जार।

टि.वि रिमोटेद् अवडयाद् “ऐंगेन हि उगलेयिद्, एन अदिकि टेटुनो माक्कोन्देन्ते बेड़ित अमट बेहिन अन्ते एन प्रोग्रामेन, पिलिमेन अन्ते समाचार गोट गोटेन एदोति पारयिन”।





मोबाइल पोनेद् अवडयाद्, “मला, ऍंगेन हि उगलेयिद्! मोबाइल पोनेनो बेहु अलार्मेत माक्रोन्द चोयिद्, संगालनिर गुनि क्रात्र नक्रिद् अन्ते वाटस एप, पेस्बुक, पावे कबरेन कुर्कले तेयिद्। आ दूरे मला एन युटूब पावा गड़हि रंगोरंगिन हों एदिन।”

लिपटापे इव इव गोट सबान मेन्जले आबेरिन अलक्राद्। मुटोन्द हि मोबाइल पोने अन्ते टि.वि रिमोटेद् मेन्जेरियार “इन्द्रिक अलक्रनि? इन्द्रा ग्रेस नुनि लेपटापेन गोट पहरा काजेक ओन्द्रिद् आज्य सोचयनि अको?”

लेपटापे अवडेकिरत्रयाद्, “मला, ग्रेस नुनि निमेन मला जे बाइबिले सबान हि उगलेयिद् आलग्कि से निमेन एन अलक्रिन। अन्ते गोसाञ्चिकि सबान टि.विनो टुन्डिद्। निमेन काजेक ओन्द्रेकि मूलिद् गा बाइबिल वचनेन ननेरिक तेयोति अन्ते गोसाञ्चि सबान मेनोति दूरे”

अदि क्रोक से ग्रेसि नुनि इन्द्रिक तमेन काजेक ओन्द्रयाद् अदे टि.वि रिमोटेद् अन्ते मोबाइल पोनेद् अकार।



### उजेनो काजेक ओन्द्रपो सबाद्:

गोसाञ्चि सबाद् उगजो अन्ते उजनि सबाद् आलग्कि नाम गोसाञ्चि सबान दिनानि पड़योति अंगोचारोति पारयित। अन्ते आद् नमेन उजेन चियिद्। नाम मोबाइल पोनेन, टि.विन, टेब, लेपटाप ई चोव समानेद् क्रेकल बागु सुकेन अन्ते उग्रहा लालचिन हों क्रटोति पारयिद् आलग्कि ईव-ईवेन काजेक ओन्द्रोति पहरा इयेहारले डोकोति मेनेनिद्। जुदि नाम ईव-ईव आकेन एडु काजेक ओन्द्रले गोसाञ्चि सबान सिकारोति अंगोचारित तानु उगजिहि आ अंगोचारेद् नमे गोसाञ्चि सबान सिकार एकोति सगाबेयेनिद्।



## दिनेद् 2: बाइबिलेद् मीलेन ओन्द्रिद्



### मनन वचनेद्





“नीम ऍंगेनो असगरकेर डोकनेर अन्ते ऍंग सबाद् निमेनो असगरकिद् बेहिद् तानि, नीम मडेर अदे गोसाञ्चिन केगेर, अन्ते अदे नीम ककरे।” योहन्ना 15:7

### बाइबिल केरिद्



गोसाञ्चित मेन्जप पेहला मलेह् अन्ते मलनिद्, आदम अन्ते हवा, गोसाञ्चिकि उकमेन मान्योलार अन्ते गोसाञ्चि गुनि बेहु मीलेन ऐवत्रयार। गोसाञ्चिकि मीलेन ऐवत्रकेर दुकेन ककरार (जरमार्प 3 मूलिद्)। आबेर गोसाञ्चिकि उकमेनो चलारेद् हि मीलेन ओजोति सगाबेयिद्। गोसाञ्चि गुनि संगालोकदिन ऐवत्रकेर दुकेन ककरार। गोसाञ्चिकि सबाद् बा ऐयेनेन मानयेद् हि संगालोकदिकि मूलिद् अदे बुजारोति पोलार आलगकि गोसाञ्चि गुने बेच्चाद् आ मीलेन ऐवत्रयार।



नाम नन्दु हों अदाम अन्ते हवा चोव गोसाञ्चि गुनि संगालोकदिन ओजोति, गोसाञ्चिद् तंगिकि ओर्त कदे तंगादेन ई केकलिक तेयाद् (योहन्ना 1:1-2)। दूसरा अदाम आनुवुह ईसु मसिह् कूसेनो केय पावा गोसाञ्चि गुनि नमेन बिरगात्रयाह् (ऐपेसुस 2:12-16)।

गोसाञ्चि सबाद् अवडि आ चोव नाम ईसु मसिन पत्यारित तानु



गोसाञ्चि गुनि संगालोकदिन जेजोति पारयेत अन्ते अदिकि कद मेनोति हों पारयित। नाम गोसाञ्चिकि पोस कदेकि उदानेन कक्रोति गोसाञ्चिकि सबाद् अगवेत्रिद् (गलातिया 4:4-7)।

### केरिद्



मीनाकि अडा मलेर एन्डोन्द मोटो सहरेनो डोके सँगयार। आबेर गोसाञ्चिन पत्यारुर अन्ते गोसाञ्चिन ऐलचुर (गोसाञ्चि सबानो चलारुर) मेन्जार। मीना अटमा किलासेनो पडच डोकयाद्, अन्ते आद् दिनानि बाइबिलेन पडयोति अम्बलाद्। मीना गोसाञ्चि गुनि बेहु मीलेन एडु ओजोति बाइबिलेन काजेक ओन्द्रयाद्।



मीना पड़ायिनो एडु नम्ब्रेन ओन्द्र डोकयाद् अदेनो अदिकि तेहो-तम्बाकोर तंगे एन्डोन्ड मोबाइल पोनेन क्रेगार अन्ते बकसिस चोव चिचार। पुने मोबाइलेन टुन्डकिद् ऐसा अपोकारयाद् अन्ते अदिकि तेहो-तम्बाकोर मोबाइलेन इयेहारले काजेक ओन्द्रोति बुदिन तेंगार। नन दिने आद् मोबाइलन स्कूलेक ओचेकिद् संगालनिरिक एदकिद् ऐसा



अपोकारयाद्। आद् अदे पड़ायि लकि काजेक ओन्द्रयाद्। दिनेद् कटकिद् एकयाद्। अदिकि संगालनिर वाटस-एपेकि पन्तेनो अन्ते पेस्बुकेकिस पन्तेनो सिकात्रियार। अन्ते आद् मोबाइलेनो गाड़े समयेन करचेत्रोति जेजयाद् आलकि तेहो-तम्बाकोर गुनि क्रात्रनक्रोति पहरान ओत्रलाद् अन्ते पड़ायिन हों डिलात्रयाद्। अन्ते आद् बाइबिलेन पड़योति हों अम्बयाद्। अदित बहानो बेच्चाद् आ मोबाइल पोनेद् हि उजेनो मूलिद् मेन्जाद्।



दिनोन्ड दिने मीना सड़केनो मोबाइलेन टुन्डे-टुन्डे ई बतेन्ते आ बजो कटुद् मेन्जाद् अदेनो तंगेन एन्डोन्ड गाड़िद् जोका हि टोकचाद्। गाड़े नुन्जुव्रलाद् जे अदिन बाचात्रोति कुरुमुट ननयाद् आ रजनि बायि (मक्करकि गिरजान चलात्रु बायि) जोकाहि नुन्जुव्रयाद्। मीना ई गटनान टुन्डकिद् चोडंगयाद्। आ दिने बेड़ित मीना रजनि बायिकि अडाक एकयाद्। रजनि बायिद् अदिन टुन्डकि अवडयाद् "निंग्कि अय्या-अब्बाबेर निंग्कि पन्तेनो ऐसा बबनार डोकनेर, आबेर अवडयार नीन अगदु आबेर गुनि गोसाञ्चिकि सबा पन्तेनो क्रात्र-नक्र सेंगकि अन्ते बाइबिलेन स्कूलेक ओच सेंगकि जे अनेके नीन गोत पहरा मोबाइलेनो हि पहरान करचेत्रनि। ई चलारेन सरयेत्रोति जोका सोचया। निंग्कि मोबाइल पोन टुन्ड पावेति इने गटना मेनोति मेन्जाद्। अन्ते निंग्कि मोबाइल पोन चलात्र

पावेत हि निंग अय्या-अब्बो गुनि क्रात्र नक्रोति हों मोद्रकि अन्ते पड़योति हों मोद्रकि। आद् दूरे मला गोसाञ्चि गुनि बेहु मीलेन हों एवत्रकि। उगजो गोसाञ्चिद् निंगेन दुलेलेत्रिद् अन्ते तंग्कि सबा पावा नम गुनि क्रात्र नक्रिद् अन्ते तंग्कि सबान बीते चोव निंग्कि उजेनो बेहत्रोति कीड़वारिद्।"

तंग्कि उजेनो इकुद् असोले अदे एवत्रकि डोकयाद् अदे अनेके उगलारयाद्। अन्ते आद् आ दिने माक्रा गसाञ्चि बहानो कबुलारयाद्। अन्ते मीना बाइबिलेन पड़योति जेजयाद्। गोसाञ्चिद् अदिन लैग-लेगात्रयाद् अन्ते अदिकि उजेनो एन्डोन्ड बदलारेद् बरचाद् अदे अडा मलेर अन्ते संगालनिर हों टुन्डोति पारचार।





### उजेनो काजेक ओन्द्रपो सबाद्:

नाम इक-इक पहरा इकुद् असोले अदे ऐवत्रोति पारयित। गसाञ्जि गुनि बेहु मीलेन एडु ओजेद् हि नमकि उजेनो मूलि मेनोति मेनिद्। नाम दिनेनि बाइबिलेन पड़योति अंगोचारेत अन्ते आद् ईसु मसि चोव मेनोति सगाबेयेनिद्। अन्ते बाइबिलेद् गोसाञ्जि गुनि अन्ते ननेरि गुनि हों एडु मीलेन बेहत्रोति सगाबेयिद्।

# दिनेद् 3: बाइबिलेद् जक्रोन पूरात्रिद्



## मनन वचनेद्



"...अनि मलेह् पिटा दूरेति मला, जे येहोवाद् क्राविद् आ बहोन्दोन्द सबात उजिह... दोहरेत्रेकि 8:3

## जेजुव्र सबाद्



क्रेकल मलेर उजोति लपे, अमुद् अन्ते डोक अडाद् ऐसा जक्रोद्। कीड़वा अन्ते सिज्याडिद्, मोसमेद्, रितिरिवाज, बेवाद् बदलारोति पारयिद्। क्रेकल मलेरिक गोटेन्ते कटप जक्रोद् गा लपे अन्ते अमुद् हि। तेहोकि पुड़ानो मके पद्रिद् अदेन्ते हि मलकि उजेनो लपेद् गा गन्डि बागु पद्रोति ऐसा जक्रोद्। अन्ते गोटे लपेत दूरे गोटे गोटेनि पूरारोलाद्। मलेर अंगे मंगे जक्रोन दूरे टुन्डनेर, इकेसारनेर अन्ते जक्रोन्ते गाड़े बेहनो गोटे अदो ईन्त्रोति उगलियनेर।



गोसाञ्चि सबाद् अवडिद्: 'मलेह् पिटा दूरेति मला, जे येहोवाद् क्राविद् आ बहोन्दोन्द सबात उजिह...' दोहरेत्रेकि 8:3

मलकि उगलिनो एन्डोन्द जगे बेहिद् अदे गोसाञ्चिद् दूरेदि बरात्रोति पारयिद्। अदे बुजारोमलार आबेर दनापानिन, बीतेन, पेसान, काजेन, पोगोलेन अन्ते मूला मेनोति हों उगलेच डोकनेर। ईसु मसिन बाचात्रु आनकेर ईन्त्रनो दूरे बरोति बेहु मेरग-राजिकि पन्तेनो आसारोति पारयेर अन्ते ई उजेनो बरतारले डोकोति पारयनेर। गोसाञ्चिकि सबाद् उगजोद् आनकेर पत्यारुर दूरे आ सबा चोव चलारोति पारयनेर। अन्ते इकनान मकेरकि लपे जक्रो आ चोव बाचारेन ईन्त्रकेर डोकु ओर्तोन्तेरिक गोसाञ्चिकि सबान दियान ननेद् हों जक्रोद्।

चामे 1:2नो, "कहयहा आबेर येहोवाकि ऐयने चोव चलारनो अपोकारनेर, अन्ते आबेर उल्लि माकि आ ऐयनेन उगलार डोकनेर।"

## केरिद्




एबि नामि ओर्त नुना सतमा किलासेनो पड़च डोकयाह। आह ऐसा कलवेह मेन्जाह अन्ते कलवि काजेन पसिनारयाह। आह तान पड़च डोकयाह आ स्कूलेनो डोकु तंकि संगालेरकि रुलेन, कलमेन, किताबेन अन्ते लप-मोकेन कड सेंगयाह। आह अडानो हों तंग अब्बोकि पेसान कड सेंगयाह। तान गलतिन कुदि आनके आह सोचयलाह। गड़ केप मकेरकि गिरजानो कलविद् पापेद् आनकेर सिकात्रयार तानि गोटे आह मान्यलाह। अहिकि पन्तेनो आगुर, तेहो-तम्बाकोर अन्ते मकेरकि गिरजान चलानुर अहि लगेर कजाक सुम्भारयार।



गर्मि चुटिनो आह चप्रि टाटगेन कलवो चोगोति संगालेर गुनि एकयाह। आह कलवो चोग पहरा अचकाहि डहडिद् तरगरयाद् अन्ते आह केकलनो उट्टयाह। आह उट्टयाह अदेनो अहिकि टेदुद् तलकरियाद्। ई कबरेन अक्केर अहिकि तेहो-तम्बाकोर अहिन आस्पतालेक ओचेकेर अहिन बरति ननयार। दिनोन्द क्रोक अहिकि मक्केरकि गिरजान चलात्रुह बया आस्पतालेनो अहेन टुन्डोति बरचाह। एबिकि जवालेन टुन्डकेह ऐसा दुकवारयाह। अहि लगिकि सुम्भारयाह अन्ते एन्डोन्द बाइबिलेन अहिकि चिचेके अदे पडयोति लेग-लेगात्रयाह। हास्पतालेनो गडु दिनि डोकोति मेन्जाद्,



एबि तंगे ककुव्रया आ बाइबिलेन पडयोति जेजयाह। गोसाञ्चिकि सबाद् अहिकि केयप उजेनो नन्दु जीवेन ओन्द्रयाद्। अन्ते आह कलवि काजेद् केले मला जे पापेद् आञ्च बुजारयाह। अन्ते आस्पतालेनो डोक पहरा गोसाञ्चि बहानो कबुलारयाह अन्ते मापेन ईन्त्रयाह। गोसाञ्चि तंग गुनि डोकिद् अदे अनेके बुजयोति जेजयाह। एडु लेहार क्रोक स्कूलेक एकोति जेजयाह। अनेके एबि तंग बहानो बेहिद् अदे ननेरिक चियु चोव बदलारयाह।



### उजेनो काजेक ओन्द्रपो सबाद्:

गोसाञ्चिकि सबाद् उजेनो एडु डोकोति सगाबेयिद् अन्ते परानिन लेग-लेगात्रिद्। गोसाञ्चिकि सबाद् पापेनो डोकित अदे एदिद्, मापिन ईन्त्रेकि पन्तेनो अन्ते पुन उजेन बुजारोति सगाबेयिद्। गोसाञ्चिकि सबान नाम पडयोति अन्ते दिनानि अदे अदयन ननित तानु नमकि गुनेन, अंगे-मंगे उजेन गोसाञ्चिकि मडु चोव अन्ते अदिकि सबा-कता चोव उजोति सगाबेयिद्।

# दिनेद् 4: बाइबिलेद् उजेन चियुद्



## मनन वचनेद्



"अनि ऐंकि ईव-ईव सबान मेन्जेकेह् अदेनो चलारिह् आ मलेह् तंग अडान गोगानो इदु अकिलताव मल चोवेह्।" मति 7:24


## बाइबिल क्नेरिद्



नमकि प्रबु ईसु मसि अहिकि सबानो चलारनेर आबेरिन गोगा मेचा अडान इदुह् मल बराबर ननिह्। गोगाद् गा मोटोद् अन्ते ऐसा अडस्रोद्। गोगाद् ताकेन, जडान, कुडनिन सहियोति बडेद् बेहिद्। जुदि इकेह् गोटे तंग्कि अडान गोगा मेचा मेन्जिह् तानु बिहाडि ताके बजनो गोटे आ अडाद् उट्रलेनिद्। आद् इलेनिद् दूरे, आ चोव, गोसाञ्चिकि सबाद् गोटे चोव अवालेनो मलेरिन बडयेत्रोति बडतानिद्। अन्ते गोसाञ्चिकि सबाद् उजेनो बरु जवालेनो सगाबेयिद् अन्ते गोसाञ्चिकि गुनेन उगलेत्रिद्।



## क्नेरिद्



अडोन्द अडानो मरकुस नामि ओर्त नुना डोकयाह्। आह् सतमा किलासेनो पड्यु मेन्जाह् अन्ते आह् ऐसा डग्रहा मेन्जाह्। आह् ईव ईव डग्रहा काजेन कुदे डोकयाह्:

1. तंग अब्बो बजारेक एकोति सपडारि अदेनो तंग अब्बोकि मोट्रसईकिल चाबिन नुडा।
2. अय्या जागु बिते डोकिद् अदेनो चिनि बेहिद् आ टिबानो बेके बदलेचाह्।



3. तंग मोमा मुन्त्रोति एकि अदेनो पले नुसग्ररोति बुरुसेकि बदला कायेक कटिन किदा।
4. तंग बेडाद् जोका-जोका हि टुन्डोति पारयिद्, मन्द्र गोलिन कटा अनि अदेनो चोक्लेटेन चिचा।

मरकुसे ई चोव कजाक डग्रहा काजेन कुदे डोकयाह्।ब

## स्कुलेनो

मरकुसे स्कुलेनो पड्योति उगलेयोलाह्। आह् एडु पड्योति पोलाह्। आलग्कि अहि संगालेर गोटेरि अहेन किजलेत्रयार।



इकनानि गोटे सिकात्रुरकि चेंगजेत सतमा किलास अमट अरगयाह् अन्ते मरकुसे सतमा किलासेनो कजाक जवालारयाह्। सतमा किलासेकि परिचानो मरकुसे एन्डोन्ड विसयनो गोटे पास मेनलाह्। अदे अहिकि संगालेर अक्कार अन्ते अहेन डेंगसेचकेर तीरकेर एकयार अहेन संगालारलार।


**इनामेद् :**



दिनोन्ड मरकुसे इस्कूलेन्ते ऐसा दुकेत अडाक किरयाह् अदेनो तम्बाकोह् इन्द्रिक दुक्रारने आव्य मेन्जेरयाह्, अन्ते तंगे इस्कूलेनो मेन्जाद् आ सबा पन्तेनो आह् तेंगाह्।

अन्ते मरकुसेकि तम्बाकोह् अहेक एन्डोन्ड बाइबिलेन इनाम चोव चिचाह् अन्ते अदे दिनेनि पड़योति अवडयाह्।

सुरुनो पड़योति जवालारयाह् आ मरकुसे अनेके जीर-जीरा बाइबिलेन पड़योति जेजयाह्।  
बाइबिलेकि वचनेद् अहिकि उजेन बदलेत्रयाद्।



**क्रोक्रति परिचाद् :**

जलदिहि इस्कूलेनो परिचा अड़सयाद्। आ परिचानो मरकुसे एडु नम्बरेन कक्काह् अन्ते तंगिकि किलासेनो पहला जगेन ककले गोटेरिन अन्दवेत्रयाह् अन्ते किलास-मूला बनारयाह्।

ई मेचगेकि कारानेद् गा आह् पड़चाह् आ बाइबिलेदि से।



**उजेनो काजेक ओन्द्रपो सबाद् :** नाम हों नमकि उजेनो बाइबिल वचनेन मोटो ननले सिब्याड़ेत्रलेत अन्ते पेहला जगेन चिचले पड़यनो आ वचने नमे उजेन कटेनिद्।

# दिनेद् 5: बाइबिलेद् एजगत्रुद्



## मनन वचनेद्

"येहोवाकि ऐयनेद् टडाबलोद्, आद् परानिन सरयेत्रुद्। येहोवाकि उकमेद् पत्यार जोकेरेद्। आद् अकिलबलोक अकिलेन चियिद्।" चामे 19:7



## बाइबिल क्नेरिद्

चामे 19:7 नो दाऊदे ईज्य अवडिह् "येहोवाकि ऐयनेद् टडाबलोद्, आद् परानिन सरयेत्रुद्।" अन्ते चामे 119 नो ई सबान 11 केप कुर्कपेद्।

गोसाञ्चिकि सबाद् उजेन चियिद्। दाऊदे गोट चोव बडेद् अन्ते ऐसा एडु उजेन उजे डोकयाह् अन्ते गोटे आह् तंग्कि उजेनो ऐजगरेकि जक्रो मेन्जाद्। अहिकि गोहायिद् दर्म-किताबेनो बेहिद् अन्ते आ गोहायि पावा नाम ईज्य बुजारित नाम पापेन्ते गुमेनारनो नमकि पत्यारेनो पदरित अन्ते गोसाञ्चिकि मापेन ईञ्चित।



ईसु मसिकि चेला पतरसेक हों जियारेकि अनुबवे जक्रो मेन्जाद्। आह् ऐलचाबलो अन्ते बड़तावे चोव एत्रनो गोटे इक-इक पहरा आह् हों बबनारयाह्। पतरसे ईसुन केवेजारयाह् आ चोव आह् नाविन्ते ऐतकेह् अमनो चरयोति जेजयाह्। अन्ते अपोलेन टून्डको आह् ऐलचयाह्। (मति 14: 25-33)। अन्ते ईसु मसि गोसाञ्चिकि तंगादेह् अन्ते आह् बिहाडि ताकेन टमात्रोति पारयुह् आज्य मोद्रकेह् अमनो डुंगोति जेजयाह्। अन्ते आह् ईज्य कूक्रकेह् अवडयाह्, "ओ प्रबु, ऐंगेन बाचात्रा!" अन्ते ईसु मुटोक्रदि तंग टेटुन बड़ात्रकेह् अहिन दरचाह्, अहिकि बड़बलो पत्यारेन चिन्चकेह् अहिन अवडयाह्, "ओ अडुप पत्यारतावे, नीन इन्द्रिक तोकमोकारके?"। अन्ते गोटे ईसु अहेन बाचात्रकेह् अहिकि पत्यारेन अन्ते आस्रारेन पुन लेहात्रयाह्।

## क्नेरिद्



क्नेपोन्द क्नेपनो एन्डोन्द मीन्जो अडाद् ओकयाद्। आ अडानो तम्बाको, तेहो अन्ते डेविडे आज्य ओर्त जोका नुना हों डोकयार। डेविडे कजाक चटपटियाह् मेन्जाह्, पड़ायिनो दियाने चियलाह्। तेहो-तम्बाकोरकि सबान हों दरयलाह्। बाइबिलेन पड़येद् गा अहिक ऐसा ओत काजेद्। आलगेकर अहि तेहो-तम्बाकोर अहेन बा इबिलेकि दामतानिन बुजात्रोति पोलार।

अनि दिनोन्द आबेर डेविडेन तमकि अडाकि एन्डोन्द पचे कोटलिन सप्पा ननोति अवडयार। डेविडे अदे सप्पा ननोति जेजयाह्। जे आह् आ काजेन ओंगोति पोलाह् अदे तंग्कि तेहो-तम्बाकोरिन अवडयाह्। आबेर अहेन नन्दु लेले अदे सप्पा नना



आनयार, अन्ते आह नन दिने हों अदे कुद ओंगोति पोलाह, जे आ कोटलिन सप्पा नन ओंगोति एक अपता पूरा काजेन कुदयाह। सप्पा नन क्रोक आह आ कोटलिन ऐसा अपोकारले तंग्कि तेहो-तम्बाकोरिन बीकले एदयाह। आबेर ऐसा अपोकारकेर अहेन, 'नुना नमकि उगलिद् हों ई कोटलि चोवेद् हि, ई कोटलिन सप्पा नन अगदु एनोन्द दुड़ि मेन्जाद् अन्ते गिदनात निन्दपे मेन्जाद्। आ चोव नमकि उगलिद् हों ई क्रेकलकि पापेत अन्ते लालचित निन्दकिद् बेहिद्। अदे दिनाने बाइबिले वचनेत सप्पा नननो

आद् निंगेन मेचग उजेक अड़सत्रेनिद्, मला तानि निंग्कि उगलिद् निंगेन डग्रहा उजेक ओयेनिद्।

आ पहरा से आ बाइबिल वचनेकि जक्रो पन्तेनो बुजारयाह। अदि क्रोक दिनानि आ बाइबिले पड़चाह अन्ते डेविडेकि उजेद् बदलारयाद् अदे अहि संगाल अहिकि तेहो-तम्बाकोर हों टुन्डयार।



**उजेनो काजेक ओन्द्रपो सबाद्:** नाम दिनानि बाइबिलेन पड़यनो वचनेद् नमकि उजेन सप्पा अन्ते पाक ननिद् अन्ते मेचग उजेक अड़सत्रेनिद्। आ लक्केत नाम दिनेनि बाइबिलेन पड़योति अंगोचारत अदि पावेत मेचग उजेन कक्केत।